



Svjedok Državnog tužilaštva prisjetio se da je vidio optuženog Srpka Pustivuka 1992. godine kako ide prema selu Gornja Bioča (općina Ilijaš), nakon čega je čuo pucnjavu i saznao da su ubijena dva civila. Svjedočeći pred Sudom BiH, Taib Đogo je ispričao da krajem maja 1992. godine vidio kada je Pustivuk, zajedno s još šestoricom naoružanih ljudi, išao prema “kućama Selimovića u selu Gornja Bioča”, nakon čega se čula pucanja.

“Vidio sam kako idu prema kućama Selimovića. Poslije 15 minuta čula se pucnjava. Vidio sam da Pustivuk nosi ranjenu djevojčicu na leđima i saznao sam da su gore poginuli Uzeir i njegov sin”, prisjetio se Đogo.

Tužilaštvo BiH tereti Srpka Pustivuka da je, kao pripadnik Stanice javne bezbjednosti (SJB) Ilijaš, s drugim pripadnicima vojske i policije Srpske Republike BiH, 29. maja 1992. godine, ili približno tog datuma, u selu Gornja Bioča učestvovao u napadu na civile, među kojima je bilo i djece. Prema optužnici, tom prilikom su ubijena dva, a teško ranjena tri civila.

Đogo je dodao da je, nakon ubistva Uzeira i njegovog sina, Bošnjacima iz Gornje Bioče naređeno da predaju lovačko oružje.

“Predali smo 12 pušaka, za koje smo imali oružane listove. Moja lovačka puška je kod Srpka Pustivuka, lično sam provjerio preko SUP-a u Bijeljini. Molim ga da mi vrati pušku”, kazao je Đogo.

Prema Đoginim riječima, mještani nesrpske nacionalnosti su 1992. godine zadržani u garaži u selu, a potom prebačeni u školu u Gornjoj Bioči. “U školi u kojoj sam bio sedam dana nisam viđao Pustivuka”, kazao je svjedok.

Milo Kostić, nekadašnji analitičar u Stanici javne bezbjednosti (SJB) Ilijaš i drugi svjedok na ovom ročištu, kazao je da je Pustivuk pripadao Jedinici za posebne namjene SJB-a Ilijaš, te da je jedinica brojala sedam ili osam ljudi.

“To su bili mlađi ljudi, neki su bili dobri, neki prepotentni”, rekao je Kostić.

Kostić je dodao da njemu nije poznato šta se dešavalo u Gornjoj Bioči u maju 1992. godine, ali da je čuo da su u tome učestvovali “vojnici iz Zenice”.

Nastavak suđenja zakazan je za 16. august ove godine.

[Preuzeto sa www.ilijas.ba](http://www.ilijas.ba)

